

07 APR 1996

Anwar-Muda

RUANG LUAS UNTUK GENERASI MUDA TANGANI MASALAH RAKYAT

KUALA LUMPUR, 7 April (Bernama) -- Generasi muda di negara ini mempunyai ruang yang luas untuk mengambil inisiatif menyelesaikan masalah yang dihadapi masyarakat, kata Timbalan Perdana Menteri Datuk Seri Anwar Ibrahim hari ini.

Katanya, mereka perlu bersikap positif dan pro-aktif dalam menangani masalah terutama yang dikaitkan dengan golongan muda seperti masalah dadah dan kemelut sosial.

"Saya percaya adik-adik seperti juga saya yang pernah aktif di kalangan mahasiswa dan pemuda, kadang-kadang terlalu bosan kalau asyik mendengar leteran berterusan tanpa ruang untuk kita kemukakan pandangan, berbicara dan mendapat peluang pendedahan yang cukup (bagi mencari penyelesaian)," katanya ketika berucap pada Konvensyen Kepimpinan Generasi Muda anjuran Pemuda Umno Malaysia di Pusat Dagangan Dunia Putra di sini.

Anwar, yang juga Timbalan Presiden Umno, berkata kepimpinan parti dan kerajaan memberikan peluang yang luas kepada generasi muda untuk sama-sama berusaha menyelesaikan masalah orang ramai.

Dalam kepesatan pertumbuhan ekonomi dan pembangunan negara, beliau mengingatkan golongan muda supaya tidak leka kerana masih banyak yang perlu dilakukan.

Soal kemiskinan, misalnya, walaupun tidak lagi berat dan melebar namun masalah itu masih ada.

"Yang kaya raya kian banyak tetapi yang miskin kalau tidak diawasi akan tersingkir dan tersisih apatah lagi kalau yang membicarakan soal perjuangan mara ke depan tidak memikirkan nasib orang yang di belakang.

"Mustahil perjuangan ini akan bermakna jika mereka tidak mewakili pandangan orang yang ketinggalan di pedalaman dan luar bandar dan asyik mencari habuan dan peluang untuk memperkaya diri sendiri," katanya.

Sebab itulah, katanya, selain mengenalpasti pertumbuhan ekonomi sebagai tunjang yang asas, kerajaan turut menekankan pengagihan kekayaan negara secara saksama dalam Rancangan Malaysia Ketujuh (RM-7), yang akan dibentangkan Perdana Menteri Datuk Seri Dr Mahathir Mohamad akhir bulan ini.

Buat pertama kali, penekanan akan diberikan kepada aspek pembangunan sosial mencakupi pendidikan, kesihatan, perumahan rakyat dan masalah sosial terutama di kalangan remaja, kata Anwar yang juga Menteri Kewangan.

Sambil menyifatkan pendekatan itu "lebih bijaksana daripada kita sekadar mengeluh", Anwar berkata masalah generasi muda perlu diselesaikan secara komprehensif dengan penyertaan keluarga serta pergerakan belia.

Sehubungan itu, beliau berharap golongan muda merenung peranan dan tanggungjawab mereka serta "tidak sekadar melemparkan tuduhan dan menyerahkan tugas kepada institusi dan agensi lain".

Selain beriman dan mempunyai kekuatan moral dan akhlak, golongan muda perlu berpegang kepada keadilan dan mempunyai keinginan untuk menimba ilmu supaya berjaya dalam membela nasib masyarakat. -- Bernama

AZZ ZAB